

U skladu sa članom 12 Zakona o udruženjima i fondacijama Bosne i Hercegovine ("Službeni glasnik BiH" br. 94/16"), na Osnivačkoj sjednici Skupštine Udruženja za filozofiju i društveno-humanistička istraživanja "Eidos" održanoj u Zenici, 15. 03. 2017. godine, Udruženje za filozofiju i društveno-humanistička istraživanja "Eidos" donosi

**S T A T U T**  
**UDRUŽENJA ZA FILOZOFIJU I**  
**DRUŠTVENO-HUMANISTIČKA ISTRAŽIVANJA "EIDOS"**  
**(dalje u tekstu: Udruženje)**

**I OPŠTE ODREDBE**

**Član 1.**

Ovim statutom se utvrđuju:

- a) naziv udruženja, skraćeni naziv i adresu Udruženja;
- b) ciljevi i djelatnosti udruženja;
- c) postupak za primanje i isključivanje članova;
- d) tijela udruženja, način na koji se biraju, ovlaštenja koja imaju, kvorum i pravila glasanja, trajanje mandata, osobu ovlaštenu da sazove skupštinu, uslove i način raspuštanja, odnosno prestanak rada;
- e) pravila za ostvarivanje, upotrebu i raspolaganje sredstvima Udruženja, kao i tijelo koje je ovlašteno za nadzor nad upotrebom tih sredstava;
- e) način podnošenja finansijskog izvještaja i izvještaja o radu;
- f) javnost rada;
- g) postupak za izmjenu i dopunu statuta, ovlaštenje i način donošenja drugih općih akata;
- h) sadržaj pečata i znaka udruženja;
- i) zastupanje udruženja;
- j) uslove i postupak za spajanje, podjelu udruženja, odnosno prestanak rada uključujući i bilo kakav poseban kvorum ili pravila za postizanje kvalifikovane većine u postupku glasanja; i
- k) postupak za raspolaganje preostalom imovinom ili drugim sredstvima u slučaju raspuštanja ili prestanka rada udruženja.

**II OSNOVNI PRINCIPI**

**Član 2.**

Osnovni principi Udruženja su:

- Djelovanje i rad u pravcu istraživanja i promocije filozofije kao i društvenih i humanističkih disciplina u Bosni i Hercegovini u cilju izgradnje kapaciteta domaćih naučnih institucija, udruženja i drugih subjekata,
- Zalaganje za podizanje i razvijanje svijesti o značaju društvenih i humanističkih nauka u Bosni i Hercegovini i širenje njihovog utjecaja među građanima Bosne i Hercegovine,
- Promocija dijaloga kako u naučnoj, tako i u široj bosanskohercegovačkoj javnosti,
- Borba protiv svih vidova diskriminacije u bosanskohercegovačkom društvu temeljena na univerzalnim moralnim vrijednostima.

### **III NAZIV, ADRESA I DJELOKRUG RADA UDRUŽENJA**

#### **Član 3.**

Naziv udruženja na sva tri jezika i dva pisma u BiH glasi:

Udruženje za filozofiju i društveno-humanistička istraživanja “Eidos”

Удружење за филозофију и друштвено-хуманистичка истраживања “Eidos”

Udruga za filozofiju i društveno-humanistička istraživanja “Eidos”

Skraćeni naziv udruženja na sva tri jezika i dva pisma u BiH je:

Udruženje “Eidos”

Удружење “Eidos”

Udruga “Eidos”

#### **Član 4.**

Sjedište Udruženja: Fakultetska bb, 72000 Zenica, BiH.

#### **Član 5.**

Udruženje djeluje na području Bosne i Hercegovine.

#### **Član 6.**

Udruženje može promijeniti naziv i sjedište Udruženja, o čemu odlučuje Skupština Udruženja, u skladu sa zakonom.

### **IV PRAVNI STATUS I PEČAT UDRUŽENJA**

### **Član 7.**

Danom upisa u registar udruženja kod nadležnog Ministarstva pravde Bosne i Hercegovine, Udruženje stiče svojstvo pravnog lica, s pravima, obavezama i odgovornostima koja proističu iz zakona i ovog Statuta.

### **Član 8.**

Udruženje ima svoj pečat. Pečat Udruženja je okruglog oblika, promjera 30 mm i u sredini sadrži naziv Udruženja: Eidos Zenica, pisan latiničnim pismom.

Po obodu pečata bit će ispisano: Udruženje za filozofiju i društveno-humanistička istraživanja Eidos Zenica.

Upotreba pečata biće regulisana Pravilnikom o upotrebi pečata.

## **V CILJEVI, ZADACI I DJELATNOST UDRUŽENJA**

### **Član 9.**

Udruženje podstiče i koordinira aktivnost svojih članova na ostvarivanju zajedničkih ciljeva i zadataka, u skladu sa Zakonom o udruženjima i fondacijama Bosne i Hercegovine i drugim zakonskim propisima, a na bazi svojih programskih ciljeva radi kojih je udruženje i osnovano.

Ciljevi i djelatnost udruženja su:

- (1) podrška inicijativama koje podstiču razvoj filozofije, te društvenih i humanističkih nauka;
- (2) podizanje nivoa znanja građana BiH o značaju istraživanja u društvenim i humanističkim naukama;
- (3) podizanje nivoa znanja građana BiH o ulozi društvenih i humanističkih nauka;
- (4) promovisanje saradnje između univerziteta, fakulteta, instituta i centara koji se bave filozofijom, te društvenim i humanističkim naukama;
- (5) promovisanje standarda u domenu slobode mišljenja, istraživanja i javnog izražavanja;
- (6) organizovanje različitih vidova naučno-istraživačkih skupova u Bosni i Hercegovini u oblastima filozofije, te društvenih i humanističkih nauka u svrhu ostvarivanja ciljeva djelatnosti Udruženja, u skladu sa Zakonom;
- (7) rad na kreiranju i koordinacija projekata koji afirmišu znanja iz oblasti društvenih i humanističkih nauka;
- (8) animiranje javnosti da učestvuju u svim vidovima djelovanja Udruženja;
- (9) fokusiranje rada na programe, inicijative i kampanje s ciljem promovisanja principa slobodnog dijaloga u BiH;

(10) publikovanje rezultata svog rada kroz različite časopise, knjige, zbornike, brošure i sl. u svrhu ostvarivanja ciljeva djelatnosti Udruženja, u skladu sa Zakonom;

(11) internacionalizacija pitanja kojima se Udruženje bavi, naročito saradnja sa srodnim udruženjima u BiH i svijetu.

#### **Član 10**

Udruženje je nestranačko, nevladino, neprofitno udruženje koje se finansira iz članarine, projekata, priloga donatora i svojih članova.

### **VI ČLANSTVO U UDRUŽENJU**

#### **Član 11.**

(1) Osnivači udruženja su ujedno i članovi Skupštine.

(2) Članovi Udruženja mogu biti i druga lica koja pristupe Udruženju i prihvate programske ciljeve i opšta akta Udruženja.

(3) Članovi Udruženja su ravnopravni.

(4) Fizička lica kao članovi Udruženja učestvuju u radu i razvijaju svoje aktivnosti neposredno, a pravna lica kao članovi Udruženja, učestvuju u radu i aktivnostima Udruženja preko svojih predstavnika.

#### **Član 12.**

Za uspješnije ostvarivanje ciljeva Udruženja u okviru Udruženja mogu se organizovati posebne redakcije, komisije, sekcije i stručni savjeti.

#### **Član 13.**

Članovi Udruženja ne mogu biti:

- lica kojima je izrečena mjera bezbjednosti zabrane javnog istupanja, dok ta zabrana traje,
- lica osuđena za krivična djela protiv bezbjednosti ili krivična djela ugrožavanja osnovnih ljudskih prava, kao i za krivična djela preuzeta po osnovu međunarodnih konvencija,
- lica koja svojim lošim odnosom prema ostalim članovima narušavaju jedinstvo Udruženja.

#### **Član 14.**

Udruženje može imati sljedeće kategorije članstva:

1. aktivne,
2. počasne i
3. potpomažuće.

#### **Član 15.**

(1) Aktivni članovi Udruženja su:

- lica koja su potpisala pristupnicu i koja aktivno rade u Udruženju i/ili obavljaju stručne i administrativne poslove u Udruženju,
- osnivači Udruženja i imenovana lica koja aktivno vrše povjerene dužnosti u organima upravljanja i radnim tijelima organa uprave Udruženja.

(2) Za stupanje u članstvo podnosi se pristupnica i izjava na pripremljenom obrascu koji sadrži sljedeće podatke:

- a) ime, prezime, odnosno naziv člana, s adresom prebivališta, odnosno sjedišta;
- b) datum pristupanja i broj pristupnice Udruženja;
- c) vrstu članstva udruženja, u skladu sa statutom;
- d) datum prestanka članstva u udruženju.

(3) Primitveni članovi se upisuju u evidenciju članova koja se vodi elektronski i u formi pohrane pristupnica u arhivi Udruženja.

(4) Svaki član Udruženja može pokrenuti postupak pred nadležnim sudom za utvrđivanje ništavnosti općeg akta udruženja koji je donesen suprotno odredbama statuta ili drugog općeg akta Udruženja, a najkasnije u roku od šest mjeseci od dana donošenja tog akta.

#### **Član 16.**

Počasni član Udruženja je lice koje Skupština Udruženja izabere za počasnog člana zbog naročitih zasluga za razvoj Udruženja.

#### **Član 17.**

Potpomažući članovi Udruženja su građani i pravna lica koja potpomažu rad i aktivnosti Udruženja u ostvarivanju ciljeva i zadataka Udruženja.

#### **Član 18.**

Aktivnim članovima Udruženja, nadležni organ upravljanja može odrediti naknadu ili nagradu za njihov rad i pružene usluge, na osnovu kriterija utvrđenih posebnim Pravilnikom.

#### **Član 19.**

- (1) U znak priznanja za savjesno ispunjavanje zadataka, za posebne rezultate i za savjestan i predan rad, Udruženje može pohvaliti i nagraditi svoje članove.
- (2) Pohvale i nagrade izdaju se u vidu pohvalnica i diploma.
- (3) Odluku o pohvalama i nagradama donosi Skupština Udruženja.

#### **Član 20.**

(1) Stupanje u članstvo je slobodno i vrši se na dobrovoljnoj osnovi, ako su ispunjeni uslovi za prijem u članstvo.

(2) Za stupanje u članstvo Udruženja podnosi se pristupnica na propisanom obrascu.

(3) Primljeni član se upisuje u evidenciju članstva.

## **VII PRESTANAK ČLANSTVA**

### **Član 21.**

Članstvo u Udruženju prestaje:

1. istupanjem,
2. isključenjem.

### **Član 22.**

Svaki član Udruženja može slobodno istupiti iz članstva, davanjem pismene izjave o istupanju.

Sa odlukom člana Udruženja o istupanju iz članstva, upoznaje se predsjednik Udruženja, nakon čega se vrši evidentiranje istupanja.

### **Član 23.**

Isključenje iz članstva se vrši u slučaju:

- a) kada član Udruženja teže povrijedi odredbe ovog Statuta ili drugih pravila Udruženja, ili ako djeluje protivno ciljevima i interesima Udruženja.
- b) kada član kontinuirano i kroz duži vremenski period zanemaruje preuzete obaveze, o čemu će odluku donijeti Skupština Udruženja.

Odluku o isključenju donosi predsjednik Udruženja, a na odluku se član Udruženja može žaliti Skupštini Udruženja. Odluka Skupštine je konačna.

Isključenje iz Udruženja povlači sa sobom i opoziv tog člana, ukoliko je izabran na određenu funkciju, odnosno predstavnika Udruženja.

## **VIII PRAVA, DUŽNOSTI I ODGOVORNOSTI ČLANOVA UDRUŽENJA**

### **Član 24.**

Prava članova Skupštine Udruženja su:

1. da biraju organe Udruženja i da u njih budu birani,
2. da ravnopravno s drugim članovima učestvuju u ostvarivanju ciljeva Udruženja;
3. da neposredno učestvuje u odlučivanju na sjednicama Skupštine, kao i preko organa Udruženja
4. da daju prijedloge, mišljenja i sugestije,
5. da prate rad Udruženja i pokreću inicijative za rješavanje pitanja od interesa za Udruženje,
6. da budu redovno informisani o radu i rezultatima rada Udruženja,

7. da u zaštiti svojih prava koriste pomoć Udruženja.

#### **Član 25.**

Dužnosti članova Skupštine Udruženja su:

1. da učestvuju u aktivnostima Udruženja;
2. da savjesno i odgovorno izvršavaju povjerene poslove i zadatke u vezi sa radom i aktivnostima Udruženja;
3. da propagiraju djelatnost Udruženja, a posebno značaj njenih programskih ciljeva;
4. da redovno izvršavaju preuzete obaveze prema Udruženju;
5. da uredno i na vrijeme izmiruju članarinu.

### **IX SKUPŠTINA UDRUŽENJA, PREDSTAVLJANJE I ZASTUPANJE UDRUŽENJA**

#### **Član 26.**

Skupština Udruženja je najviši organ upravljanja Udruženjem i čine je svi članovi Udruženja.

Način rada Skupštine pobliže se utvrđuje Poslovníkom o radu Skupštine.

#### **Član 27.**

Skupština Udruženja može biti:

- redovna i
- vanredna.

Redovna Skupština održava se u pravilu jednom godišnje i ima za cilj kontrolu rada putem razmatranja godišnjeg izvještaja o radu Udruženja.

Vanredna Skupština saziva se izuzetno, u slučaju nepredviđenih teškoća u radu, poremećaja međuljudskih odnosa u organizaciji i drugih okolnosti kada je ugrožen rad i vitalni interesi Udruženja.

#### **Član 28.**

U radu Skupštine, bez prava odlučivanja mogu prisustvovati i predstavnici drugih pravnih lica sa kojima Udruženje ostvaruje saradnju i predstavnici državnih organa.

#### **Član 29.**

Poziv o održavanju redovne Skupštine mora se uputiti članovima najmanje 7 dana prije njenog održavanja i to zajedno sa formulisanim dnevnim redom.

Skupštinu saziva predsjednik Skupštine Udruženja.

Predsjednik Skupštine Udruženja je dužan sazvati vanrednu sjednicu Skupštine na zahtjev više od 1/3 članova Skupštine.

Vanredna Skupština se saziva na temelju pismeno obrazloženog zahtjeva.

### **Član 30.**

Radom sjednice Skupštine rukovodi predsjednik Skupštine.

Skupština bira zapisničara i ovjerivača zapisnika, koji zajedno s predsjednikom Skupštine vode i potpisuju zapisnik sa sjednice.

### **Član 31.**

Skupština punovažno odlučuje kada sjednici prisustvuje prosta većina članova. Odluke i zaključci se donose većinom glasova članova koji prisustvuju sjednici, ukoliko Statutom nije predviđeno da se za donošenje određenih akata traži kvalifikovana većina. Glasanje na sjednici je javno, izuzev ukoliko Skupština na samoj skupštini ne utvrdi tajni način glasanja.

### **Član 32.**

(1) Skupština u svojoj nadležnosti:

a) donosi:

- Statut i odlučuje o njegovim izmjenama i dopunama,
- Opšta akta Udruženja i Poslovnik o radu Skupštine;
- Program rada Udruženja i njegovih organa,
- Finansijski plan za tekuću godinu i završni račun Udruženja,
- Odluke o formiranju redakcija, komisija, sekcija i stručnih savjeta, pripajanju, razdvajanju, transformiranju, raspuštanju i prestanku rada, kao i o drugim statusnim promjenama Udruženja,
- Odluku o promjeni naziva Udruženja,
- Odluku o raspodjeli imovine Udruženja, za slučaj njegovog prestanka,
- Odluke o pohvalama i nagradama zaslužnih članova Udruženja,
- Daje tumačenje odredbi ovog Statuta.

b) razmatra i usvaja:

- izvještaje o radu Udruženja, koje podnosi predsjednik i potpredsjednik Udruženja,

c) bira i imenuje:

- predsjednika i potpredsjednika Skupštine udruženja,
- predsjednika i potpredsjednika Udruženja,
- osobe za zastupanje Udruženja u pravnom prometu,
- sekretara Udruženja
- počasne članove Udruženja i vrši njihovo proglašenje.

(2) Prava, obaveze i nadležnosti predsjednika i potpredsjednika Skupštine Udruženja:

- saziva sjednice Skupštine najmanje jedanput godišnje,
- predsjedava sjednicama Skupštine,
- potpisuje odluke o imenovanju predsjednika i potpredsjednika i sve druge odluke iz nadležnosti Skupštine
- u slučaju spriječenosti, predsjednika mijenja potpredsjednik sa svim ovlaštenjima.

(3) Mandat predsjednika i potpredsjednika traje četiri godine.



(4) Prava, obaveze i nadležnosti sekretara Udruženja:

- vodi evidenciju članstva,
- priprema sjednice Skupštine Udruženja,
- priprema sjednice i druge aktivnosti po nalogu predsjednika, odnosno potpredsjednika Udruženja,
- provodi naloge predsjednika i potpredsjednika u oblasti finansijskog poslovanja,
- vrši arhiviranje akata,
- vodi zapisnik sa sjednica Skupštine Udruženja i drugih sastanaka.

Mandat sekretara Udruženja je četiri godine.

### **Član 33.**

Potpredsjednik je ovlašten da, u odsustvu predsjednika Udruženja, zastupa Udruženje i potpisuje sva finansijska i druga dokumenta u ime Udruženja.

Mandat predsjednika Skupštine traje četiri godine i mogu se ponovo birati na istu funkciju.

### **Član 34.**

Radi svestranog razmatranja i odlučivanja o pojedinim pitanjima iz djelokruga Udruženja, Skupština udruženja može obrazovati stalne i povremene redakcije, komisije, sekcije i stručne savjete.

Sastav i djelokrug redakcija, komisija, sekcija i stručnih savjeta se utvrđuje Odlukom o osnivanju istih.

### **Član 35.**

Predstavljanje Udruženja u pravnom prometu prema trećim licima povjereno je predsjedniku Udruženja, a u slučaju njegovog odsustva potpredsjedniku Udruženja.

### **Član 36.**

Predsjednika i potpredsjednika Udruženja bira Skupština, na mandatni period od četiri godine i mogu se ponovo birati na istu funkciju. Predsjednik i potpredsjednik Udruženja za svoj rad odgovaraju Skupštini.

### **Član 37.**

Predsjednik i potpredsjednik Udruženja su obavezni da poslovanje Udruženja vode po mjerilima zakona, odredbama Statuta i odlukama Skupštine Udruženja.

Predsjednik Udruženja:

- predstavlja Udruženje u pravnom prometu prema trećim licima,
- provodi i odgovara za utvrđenu politiku Udruženja,

- podnosi pismene izvještaje o radu Udruženja,
- učestvuje u pripremi svih akata Udruženja,
- potpisuje opća akta Udruženja,
- informiše javnost o aktivnostima Udruženja putem kontakta sa sredstvima informisanja, predstavnicima vlasti, trećim licima, te putem web sitea o čijoj se ažurnosti stara.

### **Član 38.**

Predsjednik i potpredsjednik Udruženja su odgovorni za sprovođenje utvrđene poslovne politike Udruženja, kao i za neostvarivanje planiranih rezultata Udruženja. Predsjednik Udruženja je obavezan najmanje jednom godišnje podnijeti pismeni izvještaj o radu Udruženja na usvajanje Skupštini. Ukoliko izvještaj o radu ne bude usvojen, smatra se da je predsjednik Udruženja razriješen svoje dužnosti.

### **Član 39.**

Za potrebe obavljanja stručnih i/ili administrativnih poslova Udruženja može se uposliti jedna ili više osoba koja ispunjava uvjete propisane Pravilnikom o radu Udruženja koji donosi Skupština Udruženja. Pravilnikom o radu bliže će se regulisati pitanja vezana za prava i obaveze po osnovu rada.

## **X IMOVINA UDRUŽENJA, STICANJE, RAPOLAGANJE I FINANSIRANJE DJELATNOSTI UDRUŽENJA**

### **Član 40.**

Prihodi Udruženja uključuju sljedeće:

- a) članarinu;
- b) dobrovoljne priloge i poklone javnih institucija, fizičkih i pravnih osoba, kako inostranih tako i domaćih, u gotovini, uslugama ili imovini bilo koje vrste;
- c) državne subvencije i ugovore sa državom, javnim institucijama, fizičkim i pravnim osobama, kako domaćim tako i inostranim;
- d) prihod od kamata, dividendi, dobiti od kapitala, zakupnina, honorara i sličnih izvora pasivnog prihoda; i
- e) prihod stečen kroz ostvarivanje ciljeva i aktivnosti udruženja ili fondacije, kako je

određeno statutom.

#### **Član 41.**

Imovinu Udruženja čine sredstva, stvari i prava. O imovini Udruženja vodi se propisana evidencija, u skladu sa Zakonom. Imovinom udruženja raspolaže Skupština.

### **XI INFORMISANJE I JAVNOST RADA UDRUŽENJA**

#### **Član 42.**

Rad Udruženja je javan.

Informisanje javnosti o aktivnostima Udruženja vrši se putem različitih publikacija, web stranice Udruženja o čijoj ažurnosti se staraju predsjednik i potpredsjednik Udruženja i putem pismenih saopštenja sredstvima informisanja.

Kontakte sa sredstvima informisanja, davanje saopštenja kao i komunikaciju sa predstavnicima vlasti i trećim licima, vrše predsjednik i potpredsjednik Udruženja.

Udruženje je dužno omogućiti nadzor nad zakonitošću rada nadležnom ministarstvu.

### **XII TRAJANJE I PRESTANAK RADA UDRUŽENJA**

#### **Član 43.**

(1) Udruženje vodi poslovne knjige i podnosi finansijske izvještaje u skladu s propisima kojima se uređuje računovodstvo neprofitnih organizacija. Udruženje podnosi godišnji finansijski izvještaj Skupštini, na način utvrđen Statutom.

(2) Finansijski izvještaj iz stava (1) ovog člana Udruženje je dužno čuvati najmanje pet godina, osim ako posebnim propisom nije utvrđen duži period čuvanja.

(3) Udruženje će učiniti dostupnim javnosti sve informacije koje se tiču njegovog rada u skladu sa pozitivnim zakonodavstvom.

(4) Udruženje za svoje obaveze odgovara svojom cjelokupnom imovinom.

(5) Nad imovinom udruženja može se provesti stečaj. Stečajni postupak provodi nadležan sud na čijem je području sjedište Udruženja, u skladu s posebnim zakonima.

(6) Članovi udruženja i Skupština Udruženja utvrđena Statutom nadziru rad

Udruženja. Ako se utvrde nepravilnosti u provođenju Statuta Udruženja, član udruženja dužan je na to upozoriti Skupštinu. Ako se upozorenje ne razmotri na

sjednici skupštine u roku od 30 dana od dana dostavljenog pismenog upozorenja i

nepravilnosti ne otklone, može se podnijeti tužba nadležnom sudu u skladu sa Zakonom.

(7) Udruženje ili fondacija prestaje raditi ako:

a) nadležni organ Udruženja donese odluku o prestanku rada ili odluku o spajanju i podjeli Udruženja;

b) se utvrdi da je Udruženje prestalo djelovati.

(8) Smatrat će se da je Udruženje prestalo djelovati kada:

a) je proteklo dvostruko više vremena od vremena utvrđenog Statutom Udruženja za održavanje Skupštine Udruženja, a Skupština, nije održana;

b) se broj članova Udruženja smanji ispod broja tri, a Skupština Udruženja u roku od tri mjeseca od nastupanja ove okolnosti ne donese odluku o prijemu novih članova Udruženja;

(9) Lice ovlašteno za zastupanje Udruženja dužno je u roku od 30 dana od dana

kada je Udruženje prestalo djelovati dostaviti Ministarstvu pravde BiH zahtjev s dokazima o prestanku rada Udruženja.

#### **Član 44.**

(1) Udruženje se može spojiti ili podijeliti u drugo udruženje.

(2) Spajanje je osnivanje novog udruženja na koje prelazi cjelokupna imovina tri ili više udruženja koja se spajaju. Spajanjem, udruženja prestaju da postoje, a na postupak upisa novonastalog udruženja primjenjuju se odredbe Zakona o udruženjima i fondacijama BiH koje se odnose na osnivanje udruženja.

(3) Udruženje se može podijeliti na dva ili više udruženja. U slučaju podjele ovo Udruženje prestaje da postoji, a na postupak upisa novonastalih udruženja primjenjuju se odredbe navedenog zakona koje se odnose na osnivanje udruženja.

(4) Udruženje može osnovati svoje kancelarije, predstavništva i podružnice u skladu sa Pravilnikom koji usvaja Skupština.

Odluku iz stavova (1), (2), (3) i (4) donosi Skupština dvotrećinskom većinom glasova.

U slučaju da Udruženje prestane sa radom, imovina Udruženja se nakon popisa i izmirenja nastalih i neizmirenih obaveza raspoređuje drugom registriranom udruženju ili fondaciji koja ima iste ili slične ciljeve i djelatnosti.

### **XIII PLANIRANJE RADA UDRUŽENJA**

#### **Član 45.**

Planiranje rada i razvoja Udruženja zasniva se na vlastitim procjenama uslova i mogućnosti ostvarivanja osnovnih funkcija radi kojih je osnovano Udruženje.

Planove rada Udruženja donosi Skupština. Odgovornost za uspješnu organizaciju funkcije planiranja snosi predsjednik Udruženja.

#### **XIV RAČUNOVODSTVO I IZVJEŠTAVANJE**

##### **Član 46.**

U Udruženju se vodi računovodstvo u skladu sa opće prihvaćenim računovodstvenim principima, kojim se osiguravaju pravovremene, potpune i tačne informacije i priprema izvještaja o poslovanju, prihodima i rashodima, imovini, kapitalu i obavezama Udruženja, za potrebe organa Udruženja i nadležnih državnih organa i drugih ovlaštenih organizacija.

##### **Član 47.**

U sjedištu Udruženja o rokovima utvrđenim zakonom ili odlukama Skupštine Udruženja, obavezno se čuvaju slijedeći dokumenti: Statut udruženja, godišnji i polugodišnji obračun poslovanja Udruženja, sa bilansima uspjeha, zapisnici i odluke Skupštine i predsjednika Udruženja, akti tekuće korespondencije i drugi akti vezani za rad i poslovanje Udruženja.

#### **XV PRELAZNE I ZAVRŠNE ODREDBE**

##### **Član 48.**

Izmjene i dopune Statuta vršiti će se na način i po postupku za njegovo donošenje.

##### **Član 49.**

Statut će se promijeniti u svim slučajevima kada se utvrdi da nije u saglasnosti sa važećim propisima.

##### **Član 50.**

Tumačenje odredbi ovog Statuta vrši Skupština Udruženja.

##### **Član 51.**

Ovaj Statut stupa na snagu danom usvajanja od strane Osnivačke skupštine Udruženja, a početak će se primjenjivati od dana upisa u registar nadležnog Ministarstva pravde BiH.

U Zenici, 15.03.2017.

Broj: 02/17

**Predsjednik Osnivačke skupštine:**

**Dževad Drino**